

## განმარტებითი ბარათი

### „საქართველოს მოქალაქეობის შესახებ“

#### საქართველოს ორგანული კანონის პროექტზე

##### ა) ზოგადი ინფორმაცია კანონპროექტის შესახებ:

###### ა.ა) კანონპროექტის მიღების მიზეზი

საქართველოს კონსტიტუციის მოქმედი რედაქციის შინაარსობრივი და ტექნიკური გადასინჯვის საჭიროებიდან გამომდინარე, საქართველოს პარლამენტმა 2017 წლის ოქტომბერში მიიღო საქართველოს კონსტიტუციური კანონის პროექტი „საქართველოს კონსტიტუციაში ცვლილებების შეტანის შესახებ“.

არსებითად შეიცვალა მოქმედი კონსტიტუციის მე-2 თავი. კერძოდ, კონსტიტუციის დღეს მოქმედი რედაქციის მე-12 მუხლი ეხება საქართველოს მოქალაქეობის საკითხებს. საქართველოს მოქალაქე იმავდროულად არ შეიძლება იყოს სხვა სახელმწიფოს მოქალაქე, გარდა იმ შემთხვევისა, როდესაც საქართველოს პრეზიდენტის მიერ უცხო ქვეყნის მოქალაქეს ენიჭება საქართველოს მოქალაქეობა განსაკუთრებული დამსახურების ან სახელმწიფო ინტერესებიდან გამომდინარე.

კონსტიტუციის ახალი რედაქციის 32-ე მუხლის თანახმად, საქართველოს მოქალაქეობის მოპოვებისა და დაკარგვის წესი, სხვა სახელმწიფოს მოქალაქისთვის საქართველოს მოქალაქეობის მინიჭების პირობები და წესი და საქართველოს მოქალაქის მიერ სხვა სახელმწიფოს მოქალაქეობის ფლობის პირობები განისაზღვრება ორგანული კანონით. შესაბამისად, საქართველოს ახალი კონსტიტუციური კანონი უცხო ქვეყნის მოქალაქეობის მიღებას აღარ განსაზღვრავს საქართველოს მოქალაქეობის დაკარგვის ავტომატურ საფუძველად. ახალი რედაქციით, სამართლებრივი საფუძველი ეყრება საქართველოს მოქალაქის მიერ სხვა სახელმწიფოს მოქალაქეობის მიღებისას ურთიერობების ახლებურად რეგულირებას. შესაბამისად, იქმნება თვისობრივად ახალი და თანამედროვე კანონმდებლობის მიღების შესაძლებლობა.

შესაბამისად, კანონპროექტის მიღება განაპირობა საქართველოს კონსტიტუციაში შესულმა ცვლილებებმა და ამ ცვლილებების საქართველოს მოქმედ კანონმდებლობაში ასახვის აუცილებლობამ.

###### ა.ბ) კანონპროექტის მიზანი

კანონპროექტის მიღების მიზანია საქართველოს მოქმედი კანონმდებლობის საქართველოს კონსტიტუციაში შეტანილ ცვლილებებთან ჰარმონიზება. კერძოდ, ცვლილების მიზანია, საქართველოს კონსტიტუციის ახალი რედაქციის 32-ე მუხლთან

“საქართველოს მოქალაქეობის შესახებ” საქართველოს ორგანული კანონის ჰარმონიზება.

**ა.გ) კანონპროექტის ძირითადი არსი**

- წარმოდგენილი საკანონმდებლო ცვლილებით, მოქმედ კანონმდებლობასთან შედარებით მკვეთრად იზრდება **სხვა ქვეყნის მოქალაქის მიერ** საქართველოს მოქალაქეობის ფლობის შესაძლებლობები. კერძოდ, მოქმედი კანონმდებლობისგან განსხვავებით გარდა **საგამონაკლისო** წესით ორმაგი მოქალაქეობის მინიჭებისა ჩნდება ორმაგი მოქალაქეობის მოპოვების დამატებითი შესაძლებლობები სხვა ქვეყნის მოქალაქეობის მიღების შემთხვევაში საქართველოს მოქალაქეობის **შენარჩუნების** და საქართველოს მოქალაქეობის **აღდგენის** შესაძლებლობის სახით.
- კანონპროექტით, დგინდება პირისათვის საქართველოს მოქალაქეობის **საგამონაკლისო** წესით მინიჭებისას მხედველობაში მისაღები პირობების ჩამონათვალი, რაც **მეტ ადამიანს** მისცემს ასეთის მოპოვების შესაძლებლობას. კერძოდ, საქართველოს მოქალაქეობის მოპოვებისათვის სახელმწიფო ინტერესის შეფასებისას, სხვებს შორის, მხედველობაში იქნება მისაღები შემდეგი გარემოებები:
  - სხვა ქვეყნის მოქალაქე საქართველოს საკუთარ სამშობლოდ მიიჩნევს და იგი ან მისი წინაპარი:
    - საქართველოს **ოკუპირებულ ტერიტორიებზე** მცხოვრები ან აღნიშნული ტერიტორიებიდან იძულებით გადაადგილებული პირია;
    - სხვადასხვა დროს **პოლიტიკური მოსაზრებით ან მძიმე სოციალურ-ეკონომიკური** მდგომარეობის გამო ემიგრაციაში წასული პირია;
    - სხვა ქვეყნის მოქალაქე საქართველოში ახორციელებს/განახორციელა ისეთი **ინვესტიცია**, რომლითაც მას სახელმწიფოს ეკონომიკის განვითარებაში მნიშვნელოვანი წვლილი შეაქვს/შეიტანა;
    - სხვა ქვეყნის მოქალაქე **წარმატებულია** სპორტის, მეცნიერების ან/და ხელოვნების სფეროში და სურს **მოღვაწეობა განაგრძოს საქართველოს სახელით.**
- კანონპროექტით დგინდება, რომ საქართველოს მოქალაქე **ინარჩუნებს** საქართველოს მოქალაქეობას სხვა ქვეყნის მოქალაქეობის მოპოვების შემთხვევაში, თუ იგი აღნიშნული ქვეყნის მოქალაქეობის მოპოვებამდე საქართველოს სახელმწიფოდან მიიღებს **თანხმობას** საქართველოს მოქალაქეობის შენარჩუნებაზე:
  - სახელმწიფო **უსაფრთხოების** ან/და საზოგადოებრივი უსაფრთხოების დაცვის ინტერესების გათვალისწინების პარალელურად, მოქალაქეობის

შენარჩუნების დროს, პირი უნდა აკმაყოფილებდეს ერთ-ერთ შემდეგ წინაპირობას:

- საქართველოს მოქალაქის **ოჯახის წევრი** იმ ქვეყნის მოქალაქეა, რომლის მოქალაქეობის მიღებასაც იგი აპირებს;
  - საქართველოს მოქალაქე სულ მცირე **5 წლის** განმავლობაში კანონიერი საფუძვლით ცხოვრობს ან მუშაობს იმ ქვეყანაში, რომლის მოქალაქეობის მიღებასაც იგი აპირებს.
  - არასრულწლოვანს, რომელმაც საქართველოს მოქალაქეობასთან ერთად სხვა ქვეყნის მოქალაქეობა მოიპოვა დაბადებით, საქართველოს მოქალაქეობა უნარჩუნდება **დაბადებიდან 2 წლის** განმავლობაში.
- კანონპროექტით გათვალისწინებულ სიახლეს წარმოადგენს, ასევე, **აღდგენის დროებითი უფლება**:
- საქართველოს ყოფილ მოქალაქეს, რომელმაც დაკარგა საქართველოს მოქალაქეობა სხვა ქვეყნის მოქალაქეობის მოპოვების გამო, უფლება აქვს ამ კანონის ამოქმედებიდან **ორი წლის ვადაში** მიმართოს სააგენტოს საქართველოს მოქალაქეობის **აღდგენის წესით** მინიჭების მოთხოვნით.
  - საქართველოს მოქალაქეობის აღდგენის წესით მინიჭების შემთხვევაში საქართველოს მოქალაქეობა მიენიჭება მის არასრულწლოვან შვილსაც.
- კანონპროექტით იცვლება მოქალაქეობის მინიჭებისათვის საქართველოში **ცხოვრების ცენზები**.
- ჩვეულებრივი წესით მოქალაქეობის მინიჭებისას **5 წლიანი** ცხოვრების ცენზი იზრდება **10 წლამდე**.
  - გამარტივებული წესით მოქალაქეობის მინიჭებისას კი, **2 წლიანი** ცხოვრების ცენზი იზრდება **5 წლამდე**.
- იცვლება პირისათვის **უარის თქმის საფუძვლები**. კერძოდ:
- პირობათა ჩამონათვალს ემატება თუ იძებნება საქართველოს ან უცხო ქვეყნის სამართალდამცავი ორგანოების ან საერთაშორისო კრიმინალური პოლიციის (**ინტერპოლის**) მიერ, ან/და მის მიმართ მიმდინარეობს საექსტრადიციო ან გაძევების პროცედურა.“.
  - ამასთან, პირისთვის ადამიანის, სახელმწიფოს, საზოგადოებრივი უშიშროებისა და წესრიგის წინააღმდეგ მიმართულ განსაკუთრებით მძიმე დანაშაულში მონაწილეობა მოქალაქეობაზე უარის თქმის საფუძველი იქნება მხოლოდ ნასამართლობის **მოხსნამდე ან გაქარწყლებამდე**.

- კანონპროექტით, ასევე, იცვლება **პრეზიდენტის კომპეტენცია** საქართველოს მოქალაქეობის მინიჭების ნაწილში:
  - **პრეზიდენტს აღარ ექნება** მოქალაქეობის საკითხის განხილვასთან დაკავშირებული რიგი საკითხების რეგულირების კომპეტენცია. მათ შორის:
    - იცვლება **კომისიის დაკომპლექტების წესი**: კომისიის თავმჯდომარე იქნება სააგენტოს თანამშრომელი; კომისიის წევრი აღარ იქნება ეროვნული უშიშროების საბჭოს წარმომადგენელი; სააგენტოს ეყოლება ორი წარმომადგენელი ნაცვლად არსებული ერთისა.
    - მოქალაქეობის მინიჭების/შეწყვეტის/დაკარგვის წესი განისაზღვრება **კომისიის დადგენილებით**, ნაცვლად პრეზიდენტის ბრძანებისა.
    - საგამონაკლისო წესით მოქალაქეობის მინიჭებისათვის აღარ იქნება შესაძლებელი პირდაპირ **პრეზიდენტისათვის მიმართვა**.
- მკაფიოდ იმიჯნება და ნაცვლად პრეზიდენტის ბრძანებულებისა, ორგანული კანონის დონეზე ზუსტდება მოქალაქეობის მინიჭების თაობაზე გადაწყვეტილების მიღებაში ჩართულ **ორგანოთა კომპეტენცია**:
  - კომისია უზრუნველყოფს საქართველოს მოქალაქეობის მინიჭების (გარდა საგამონაკლისო წესით საქართველოს მოქალაქეობის მინიჭებისა) მსურველ პირთა **ცოდნის დონის** შემოწმებას, საქართველოს მოქალაქეობის შენარჩუნების. აგრეთვე სხვა ქვეყნის მოქალაქისათვის საგამონაკლისო წესით საქართველოს მოქალაქეობის მინიჭების **პირობების არსებობის დადგენას**. კომისიის გადაწყვეტილების საფუძველზე შესაბამის დასკვნას ამზადებს სააგენტო.
  - საქართველოს მოქალაქეობის დაბადებით მოპოვებაზე, საქართველოს მოქალაქეობის დადგენასა და საქართველოს მოქალაქეობის შეწყვეტაზე განცხადებასა და წარდგინებას განიხილავს და შესაბამის **დასკვნას ამზადებს სააგენტო**.
  - მოქალაქეობის შენარჩუნების ახალი ინსტრუმენტის დანერგვის პირობებში, **მოქალაქეობის შენარჩუნებაზე თანხმობას** გასცემს სააგენტო;
  - საქართველოს მოქალაქეობის მინიჭების ან მინიჭებაზე უარის, ასევე, საქართველოს მოქალაქეობის შეწყვეტის თაობაზე **სააგენტოს დასკვნები** საბოლოო გადაწყვეტილების მისაღებად ეგზავნება საქართველოს პრეზიდენტს.
  - საქართველოს მოქალაქეობის მინიჭების, მინიჭებაზე უარის ან შეწყვეტის შესახებ საკითხებზე **საბოლოო გადაწყვეტილებას იღებს საქართველოს პრეზიდენტი**.

- წარმოდგენილი კანონპროექტი ითვალისწინებს მოქალაქეობის თაობაზე გადაწყვეტილების გასაჩივრების განსხვავებულ მექანიზმს.
  - განსხვავებით, მოქმედი კანონმდებლობისაგან, როდესაც გასაჩივრებას არ ექვემდებარება მხოლოდ საგამონაკლისო წესით მოქალაქეობის მინიჭებაზე უარი, წარმოდგენილი კანონპროექტით საქართველოს მოქალაქეობის საკითხზე საქართველოს პრეზიდენტის მიერ მიღებული გადაწყვეტილება არ დაექვემდებარება სასამართლოში გასაჩივრებას. აღნიშნული წესიდან ერთადერთი გამონაკლისი იქნება საქართველოს მოქალაქეობის შეწყვეტის თაობაზე გადაწყვეტილება.
- ასევე, წარმოდგენილი ცვლილებით ზუსტდება რამდენიმე საკითხი:
  - ზუსტდება, რომ არასრულწლოვანისთვის მოქალაქეობის შეცვლისათვის საჭიროა ორივე მშობლის თანხმობა.
  - მოქალაქეობის შესახებ კანონმდებლობა შესაბამისობაში მოდის მხარდაჭერის მიმღების შესაძლებლობებთან:
    - სახელმწიფო ენის, სამართლისა და ისტორიის ცოდნის მოთხოვნები არ ვრცელდება იმგვარი ფიზიკური ნაკლის მქონე პირებზე, რომელიც შეუძლებელს ხდის მოთხოვნათა შემოწმებას.
  - ზუსტდება და ემატება რამდენიმე ახალი ტერმინი:
    - არასრულწლოვანი პირი – 18 წლამდე ასაკის პირი გარდა იმ პირისა.
    - ოჯახის წევრი - უცხოელის ან საქართველოს მოქალაქის მეუღლე, შვილი, მშობელი, მშვილებელი, ნაშვილები, და-ძმა, პაპა, ბებია, შვილიშვილი, უცხოელის ან საქართველოს მოქალაქის მეურვეობის ან მზრუნველობის ქვეშ ან/და სრულ კმაყოფაზე მყოფი არასრულწლოვანი, მხარდაჭერის მიმღები ან შრომისუუნარო პირი;
    - წინაპარი – პირის აღმავალი შტოს ხუთი თაობა.“.
  - ზუსტდება, სააგენტოს ადმინისტრაციულ-სამართლებრივი აქტის ძალაში შესვლის, გამოქვეყნების და ვადის ათვლის საკითხები.
  - კანონში ჩნდება მითითება სხვა ქვეყნის მოქალაქის უფლების თაობაზე, მიმართოს უფლებამოსილ ორგანოს საქართველოს მოქალაქეობის მინიჭების შესახებ.

ბ) კანონპროექტის ფინანსური დასაბუთება:

ბ.ა) კანონპროექტის მიღებასთან დაკავშირებით აუცილებელი ხარჯების დაფინანსების წყარო:

კანონპროექტით გათვალისწინებული დამატებითი ხარჯები საჭიროების შემთხვევაში დაფინანსდება სახელმწიფო ბიუჯეტიდან.

### **ბ.ბ) კანონპროექტის გავლენა ბიუჯეტის საშემოსავლო ნაწილზე**

წარმოდგენილი კანონპროექტი ითვალისწინებს ცვლილებებს საქართველოს მოქალაქეობის მოპოვებისა და დაკარგვის წესის, სხვა სახელმწიფოს მოქალაქისთვის საქართველოს მოქალაქეობის მინიჭების პირობების და წესის და საქართველოს მოქალაქის მიერ სხვა სახელმწიფოს მოქალაქეობის ფლობის პირობების შესახებ შესაბამის მუხლებში (მე-12, მე-14, მე-16, მე-17, 21<sup>1</sup>-ე და 32<sup>2</sup>-ე მუხლები), რამაც შესაძლოა გამოიწვიოს რიგ შემთხვევებში სსიპ - სახელმწიფო სერვისების განვითარების სააგენტოში შესაბამისი განცხადებებით მიმართვიანობის ზრდა, ხოლო რიგ შემთხვევებში - კლება. აღნიშნულს კი შესაბამისად შესაძლოა გავლენა ჰქონდეს სააგენტოს ბიუჯეტის საშემოსავლო ნაწილზე განცხადებების საფასურის კუთხით, ხოლო სახელმწიფო ბიუჯეტის საშემოსავლო ნაწილზე სააგენტოს მიერ მომსახურების გაწევიდან მიღებული შემოსავლებიდან გადასახდელი დღგ-ს მიმართულებით. თუმცა უნდა აღინიშნოს, რომ ამ ეტაპზე 21<sup>1</sup>-ე მუხლით გათვალისწინებულ შემთხვევაში არასრულწლოვანისთვის საქართველოს მოქალაქეობის შენარჩუნების მიზნით მშობლების ან კანონიერი წარმომადგენლის განცხადებისთვის რამე სახის საფასური დადგენილი არ არის.

ცვლილება შედის, აგრეთვე, კანონის 22-ე მუხლის მე-3 პუნქტში, რომლის თანახმად კანონის მე-17 მუხლით გათვალისწინებულ შემთხვევაში პირი საქართველოს მოქალაქეობის მინიჭების შესახებ განცხადებას აღარ წარუდგენს საქართველოს პრეზიდენტს. შესაბამისად, კანონის მე-17 მუხლით გათვალისწინებული ის განცხადებები, რომლებიც უნდა წარგენოდა საქართველოს პრეზიდენტს, ცვლილების შემდეგ შესაძლოა მიიმართოს სააგენტოში, რასაც შესაძლოა გავლენა ჰქონდეს სააგენტოს ბიუჯეტის საშემოსავლო ნაწილზე ზრდის მიმართულებით გაზრდილი განცხადებების საფასურის თვალსაზრისით და შესაბამისად, სახელმწიფო ბიუჯეტის საშემოსავლო ნაწილზე დღგ-ს მიმართულებით.

წარმოდგენილი კანონპროექტი, ასევე, ითვალისწინებს მოქალაქეობის თაობაზე განცხადებით მიმართვის ინტენსივობის შემცირებას (მუხლი 26). კერძოდ, პირს ხელმეორედ განცხადების წარდგენის უფლება ექნება პირველი განცხადებიდან 1 წლის შემდგომ 6 თვის ნაცვლად. შესაბამისად, მოქალაქეობის თაობაზე განმეორებით მიმართვიანობის შესაძლო შემცირების შედეგად აღნიშნულ კანონპროექტს შესაძლოა გავლენა ჰქონდეს სააგენტოს ბიუჯეტის საშემოსავლო ნაწილზე შემცირების მიმართულებით განცხადებების საფასურთან მიმართებაში, რამაც შესაძლოა აგრეთვე გავლენა იქონიოს სახელმწიფო ბიუჯეტის საშემოსავლო ნაწილზე დღგ-ს მიმართულებით.

გარდა ზემოაღნიშნულისა, ცვლილება შედის აგრეთვე კანონის 29-ე მუხლში, რომლის თანახმად საქართველოს მოქალაქეობის საკითხზე საქართველოს პრეზიდენტის მიერ მიღებული გადაწყვეტილება, გარდა საქართველოს მოქალაქეობის შეწყვეტის თაობაზე გადაწყვეტილებისა, აღარ დაექვემდებარება სასამართლოში გასაჩივრებას. აღნიშნულმა ცვლილებამ შესაძლოა გავლენა მოახდინოს სასამართლოს მიერ განსახილველ საქმეთა რაოდენობაზე შემცირების მიმართულებით და შესაბამისად, სახელმწიფო ბიუჯეტის საშემოსავლო ნაწილზე სახელმწიფო ბაჟის მიმართულებით.

### **ბ.გ) კანონპროექტის გავლენა ბიუჯეტის ხარჯვით ნაწილზე**

წარმოდგენილი კანონპროექტი ითვალისწინებს ცვლილებებს საქართველოს მოქალაქეობის მოპოვებისა და დაკარგვის წესის, სხვა სახელმწიფოს მოქალაქისთვის საქართველოს მოქალაქეობის მინიჭების პირობების და წესის და საქართველოს მოქალაქის მიერ სხვა სახელმწიფოს მოქალაქეობის ფლობის პირობების შესახებ შესაბამის მუხლებში (მე-12, მე-14, მე-16, მე-17, 21<sup>1</sup>-ე, 26-ე და 32<sup>2</sup>-ე მუხლები), რამაც შესაძლოა გამოიწვიოს რიგ შემთხვევებში სსიპ - სახელმწიფო სერვისების განვითარების სააგენტოში შესაბამისი განცხადებებით მიმართვიანობის ზრდა, ხოლო რიგ შემთხვევებში - კლება. იმ შემთხვევაში, თუ მნიშვნელოვნად გაიზრდება შესაბამისი მიმართვიანობა, აღნიშნულმა შესაძლოა გავლენა მოახდინოს სააგენტოს ბიუჯეტის ხარჯვით ნაწილზე თუ საჭირო გახდება დამატებითი ადამიანური რესურსი და კომისიის ბიუჯეტის ხარჯვით ნაწილზე.

ვინაიდან კანონპროექტის 22-ე მუხლის მე-3 პუნქტის თანახმად, საგამონაკლისო წესით გათვალისწინებულ შემთხვევაში პირი საქართველოს მოქალაქეობის მინიჭების შესახებ განცხადებას აღარ წარუდგენს საქართველოს პრეზიდენტს, აღნიშნულს შესაძლოა გავლენა ჰქონდეს პრეზიდენტის ადმინისტრაციის ბიუჯეტის ხარჯვით ნაწილზე შემცირების მიმართულებით, ვინაიდან შემცირდება პრეზიდენტის ადმინისტრაციის მიერ განსახილველ საქმეთა რაოდენობა აღნიშნული მიმართულებით, ხოლო სსიპ- სერვისების განვითარების სააგენტოს ბიუჯეტის ხარჯვით ნაწილზე ზრდის მიმართულებით საგამონაკლისო წესით გათვალისწინებულ შემთხვევაში განცხადებების სააგენტოში მიმართვასან დაკავშირებით ნაცვლად პრეზიდენტის ადმინისტრაციისა.

წარმოდგენილი კანონპროექტი ითვალისწინებს ცვლილებას კანონის 29-ე მუხლში, რომლის თანახმად საქართველოს მოქალაქეობის საკითხზე საქართველოს პრეზიდენტის მიერ მიღებული გადაწყვეტილება, გარდა საქართველოს მოქალაქეობის შეწყვეტის თაობაზე გადაწყვეტილებისა, აღარ დაექვემდებარება სასამართლოში გასაჩივრებას. აღნიშნულმა ცვლილებამ შესაძლოა გავლენა მოახდინოს სასამართლოს მიერ განსახილველ საქმეთა რაოდენობაზე შემცირების მიმართულებით და

შესაბამისად, შესაძლოა აღნიშნულიდან გამომდინარე გავლენა იქონიოს სასამართლოს ბიუჯეტის ხარჯვით ნაწილზე შემცირების მიმართულებით.

#### **ბ.დ) სახელმწიფოს ახალი ფინანსური ვალდებულებები**

კანონპროექტის მიღებით სახელმწიფოს ახალი ფინანსური ვალდებულებები არ წარმოიქმნება.

#### **ბ.ე) კანონპროექტის მოსალოდნელი ფინანსური შედეგები იმ პირთათვის, რომელთა მიმართაც ვრცელდება კანონპროექტის მოქმედება**

წარმოდგენილი კანონპროექტი ითვალისწინებს ცვლილებებს საქართველოს მოქალაქეობის მოპოვებისა და დაკარგვის წესის, სხვა სახელმწიფოს მოქალაქისთვის საქართველოს მოქალაქეობის მინიჭების პირობების და წესის და საქართველოს მოქალაქის მიერ სხვა სახელმწიფოს მოქალაქეობის ფლობის პირობების შესახებ შესაბამის მუხლებში (მე-12, მე-14, მე-16, მე-17, 21<sup>1</sup>-ე, 26-ე და 32<sup>2</sup>-ე მუხლები), რამაც შესაძლოა გამოიწვიოს რიგ შემთხვევებში სსიპ - სახელმწიფო სერვისების განვითარების სააგენტოში შესაბამისი განცხადებებით მიმართვიანობის ზრდა, ხოლო რიგ შემთხვევებში - კლება, რასაც შესაბამისად გავლენა ექნება შესაბამისი პირების მიერ განცხადებების წარდგენის საფასურის გადახდის მიმართულებით.

წარმოდგენილი კანონპროექტი, ასევე, ითვალისწინებს მოქალაქეობის თაობაზე განცხადებით მიმართვის ინტენსივობის შემცირებას (მუხლი 26). კერძოდ, პირს ხელმეორედ განცხადების წარდგენის უფლება ექნება პირველი განცხადებიდან 1 წლის შემდგომ 6 თვის ნაცვლად. შესაბამისად, მოქალაქეობის თაობაზე განმეორებით მიმართვიანობა შესაძლოა შემცირდეს და შესაბამისად, შემცირდეს შესაბამისი პირების მიერ სააგენტოში განცხადებების საფასურის გადახდის შემთხვევები.

ასევე, მოქმედი კანონმდებლობით საქართველოს მოქალაქეობის თაობაზე პრეზიდენტის გადაწყვეტილება ექვემდებარებოდა გასაჩივრებას. წარმოდგენილი კანონპროექტით კი ამგვარი შესაძლებლობა უქმდება (მუხლი 29), რამაც შესაძლოა შეამციროს სასამართლოს მიერ განსახილველ საქმეთა რაოდენობა და ამ მიმართულებით შესაბამისი პირების მიერ გადახდილი სახელმწიფო ბაჟის გადახდის შემთხვევები.

#### **ბ.ვ) კანონპროექტით დადგენილი გადასახადის, მოსაკრებლის ან სხვა სახის გადასახდელის ოდენობა და ოდენობის განსაზღვრის პრინციპი**

კანონპროექტი არ ადგენს გადასახადს, მოსაკრებელს ან სხვა სახის გადასახდელს.

#### **გ) კანონპროექტის მიმართება საერთაშორისო სამართლებრივ სტანდარტებთან.**

##### **გ.ა) კანონპროექტის მიმართება ევროკავშირის დირექტივებთან:**

კანონპროექტის მიღება არ ეწინააღმდეგება ევროკავშირის დირექტივებს.

**გ.ბ) კანონპროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან;**

კანონპროექტი არ ეწინააღმდეგება საერთაშორისო ორგანიზაციებში საქართველოს წევრობასთან დაკავშირებულ ვალდებულებებს

**გ.გ) კანონპროექტის მიმართება საქართველოს ორმხრივ და მრავალმხრივ ხელშეკრულებებთან;**

კანონპროექტი არ ეწინააღმდეგება საქართველოს ორმხრივ და მრავალმხრივ ხელშეკრულებებს.

**დ) კანონპროექტის მომზადების პროცესში მიღებული კონსულტაციები:**

**დ.ა) სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტები, რომლებმაც მონაწილეობა მიიღეს კანონპროექტის შემუშავებაში, ასეთის არსებობის შემთხვევაში**

საქართველოს მთავრობის ადმინისტრაცია, საქართველოს იუსტიციის სამინისტრო, საქართველოს შინაგან საქმეთა სამინისტრო, საქართველოს საგარეო საქმეთა სამინისტრო, სახელმწიფო უსაფრთხოების სამსახური.

**დ.ბ) კანონპროექტის შემუშავებაში მონაწილე ორგანიზაციის (დაწესებულების) ან/და ექსპერტის შეფასება კანონპროექტის მიმართ, ასეთის არსებობის შემთხვევაში**

ასეთი არ არსებობს.

**ე) კანონპროექტის ავტორი**

კანონპროექტის ავტორია იურიდიულ საკითხთა კომიტეტში შექმნილი კონსტიტუციასთან კანონმდებლობის ჰარმონიზების სამუშაო ჯგუფი.

**ვ) კანონპროექტის ინიციატორი**

კანონპროექტის ინიციატორია იურიდიულ საკითხთა კომიტეტი